

茶
香
室
叢
鈔

茶香室叢鈔序

茶香室者內子姚夫人所居室名也余既葬夫人於右
台山自營生壙於其左又於山中築右台仙館卽署此
三字於臥室中余每至杭州或居湖樓或居山館其在
山館輒以茶香室爲寢處之所因思夫人曩時每流覽
書籍遇有罕見罕聞之事必以小紙錄存之積至六七
十事然以見書不多不能時有采獲且其所謂罕見罕
聞者或實亦人所習見習聞焉久之意倦又久則拉襍
摧燒之矣余自夫人之亡逾二年長子隕焉其明年又
有次女繡孫之變骨肉凋零老懷索寞宿疴時作精力

益衰不能復事著述而塊然獨處又不能不以書籍自娛偶踵夫人故智遇罕見罕聞之事亦以小紙錄出之積歲餘得千有餘事不忍焚棄編纂成書嗟乎余腹中之笥無以遠過乎夫人安知吾所謂罕見罕聞者博雅之士不習見之而習聞之乎書成名之曰茶香室叢鈔謂是吾之書可也謂是夫人之遺書亦可也光緒癸未端五日曲園居士書

茶香室叢鈔目錄

卷一

箕子易

明代諸家擬易之書

宋福建本周易

震卦有聲無形

占卦新法

趙子昂尙書集注序

齊服

菁茅

柎鬯

湯征葛異說

血流漂杵

關雎

有齊季女

聊樂我員

從子于鶴

坎坎鼓我

出自幽谷

直不聽宋神宗說

雜帶維蛇

有北

躍躍龜兔

嵩高維嶽

左傳是太史公之梳

筮短龜長

昭王南征

籓旗

爲人後者不入

先進於禮樂蘇子瞻說

孰謂微生高直孫奕說

有馬者借人乘之劉元城說

負版

長沮桀溺語

在陳絕糧

刺孟諸書

始作俑者

吾我二字

先聖先師

經書刪節本

舍注疏立異論

農孝經酒孝經

卷二

盤古卽元始天尊

許耳

章鶴

伯夷叔齊

伯夷之弟

比干心寸五穴

慈童

管仲父名

先聖本名兵

孔子至吳越

素相

蘧伯玉軼事

曾子子貢軼事

宰我朝歌墮車

曾子沈水

子韋

華子期

毛萇

周貞實

時亮

寇先

孫什

計成

謝允

所輔

虞詡字定安

杜周三子名

盧白頭

開元中十八學士

都督閻公堵

吳嶠

房元齡名字

張龜齡

溫庭雲

枯松太保

衛遯

韓臙眼

馮道不知生日

陶穀本姓唐

八大王

八大王之子

蘇杲

林和靖祖

司馬公實王介卿

蘇明允謚

東坡一字子平

老泉山人

袁綯

邵鮫

章望之

蘇佛兒

老申

張百杯張百篇

四清

黃子久名靜堅

海鷗

引歌

張小舍

陳濟

南翔八老

吳門四才子

吳雨田

朱太平

馮玉瑛

卷三

公冶長書梅嶺碑

畫藏文仲於卞和之旁

楚僚臥冰

趙仲讓

五世公

李郭同車

天寶改元

快活三郎

李輔國爲高力士所殺

李林甫像

荔枝之禍

僧一行寄蜀當歸

柏封大夫

竇家槐

柳公權畫竹

武肅射湖

辨皮日休事

王逸老

唐餘錄

火宋

慎火停水

瀧岡阡

張齊賢語

成都繪像

不解南音

宋開封府題名

包順

青沙爛

伊川不作生日

蘇子瞻章子厚遇虎事

趙清獻琴鶴龜

東坡像

石曼卿受杖

鐵蛤蜊

雞肘博士

洗面濯足

丁仙現

祭姦臣首級

蔡京蔡卞

蔡檜生於舟中

韓蘄王騎驃

王厚齋爲言路所論

文信國頂有拳髮

田時秀

原年

明永樂西域人至中國

永樂朝待詞臣之酷

明仁宗不善終

王振由教官出身

選侍

客氏名刺

明季流寇起釁於婦人

由柏

宦官八字

呼吏爲都

亭長

唐人更點擊鐘

唐人猶尙右

舉人流落教坊

游士持書干謁

盜賊白號仙君

顧舟契

算盜絹數

拔釘錢

單名空格

書疏別紙

勒姓

卷四

中山夫人

褒姒事異說

妲己

衛靈公女

魯班妻雲氏

絡慕

文珠

邢三姑

秦始皇美人

項王妾

戚夫人

姚精二女

張帛

蔡伯喈母

彪袁

木蘭

烈女貞節圖

玉奴

楊妃粉

嬌陳

瀟溪女史

辨金鑿子事

杜仲陽

劉將軍

包孝肅公子婦崔氏

東坡妾碧桃

東坡妾榴花

鶯鶯燕燕

韓蘄王妻妾

秦檜妻

女秀才

翁夫人石像

楊九娘

碧虬

一丈白

十四鹽

記日本二女子

虔婆

姬人爭物

卷五

元氣重十六兩

鼻中氣

一世二世有順
數逆數二例

義居

義莊

榮侍下

重侍下

宰相具慶

宰相母喪

上諱下諱

父憂母難

男用女嫻女用男嫻

過房

添房

女年二十不待
父母服除而嫁

畫父母像

詠蓼我泣涕

減算延母壽

子死捐生

七女造塋

五女激

女爲父立碑

一產三十六子

東金西木

冰玉

男子亦稱歸甯

作伐

郎罷之罷可讀平聲

阿茶

姐姐

白因

稱謂之異

麼些人名

姑姑

嬭

稱妻父爲岳

尊夫人

上下同門

稱人曰老兄

仁弟

年兄

鄉弟

晚友生

同門

同學

門孫鄉祖

致政大夫

老爺

大人

自稱卑末

院君

鴉囊

雲萍錄

清甲

雁泊人戶

貴壽無後

家乘

百歲以上人

社公兒

唐大漢

人物化石

卷六

古金價

漢田畝價

十分稅一

宋印歲易

印闢書

金字牌

飛鳥使

家書許附遞

舉人給來往公券

舉人著青衫

禁服黃自唐始

忌純白

以著靴爲敬

背胸

石位

紫花墩賜坐

乘馬至殿門

當廳下轎

禁武官乘轎

禁謁

儀鸞司

選人家狀

宋時見任官得應舉

宋高宗御書玉堂字

學士非具員吏

校書官日課

宋時史官

除擢侍從先命日者推算

僧爲州學博士

小兒官

害肚感風

開印封印

臧否奏

薪俸

辟謫籍人

將帶隨行

通事

彤騶

公牘書行字

欽此欽遵

照得

前三後四

大狀小狀

忌用大行字

唐時回贈之例

贈本生父母

古人親在不居丁憂之闕

父祖未葬不析居

嫡孫承重服始於宋劉輝

古人忌日亦受弔

問疾攜紙錢

人臣祭皇后

人臣女封郡縣主

制誥封贈字句之數

室人

公生明坊舊是立碑

私債以恩詔免

侵竊之弊

關防

枷分三等

金人婦女亦纏足

卷七

唐時江浙進士明經人數

進士題名記

張安道論科第

杜荀鶴及第試卷

咸淳七年同年小錄

殿試策

不寫策題

試卷中許添注塗改

塗注乙

試卷以針穿爲記

殿試卷以紅圈斷句

御試進士先宣示十人卷

懷挾文字

唐禮部試不禁懷挾

狀元

印賣狀元賦

出狀元

賜出身

擔榜狀元

狀元跛警

解元解副

唐時通榜之風太濫

金花帖子

報捷以名次高下定價

團

改名登第

唐時追贈不及第人

閩音中選

歐陽文忠公
場屋中執事

宋制房官考校與今制異

濃筆抹至尾

殊次平

三八課試

選程墨

會課

十榜傳家

兄弟登科相
距一甲子

一科兩張銓

一人試三卷皆中選

高蹈邱園科

明制生員仍
就府縣試

饒州神童

三同

同年之父不稱年伯

杭學多游士

臨安士人作鬧

妻代夫入闈

卷八

唐人選唐詩

五言金城

事賈島像有二人

契丹求魏野詩

算袋中詩句

二李唱和集

陳亞澄源集

詠三

青衫白髮對句

北方詩社

義試詩

韓海蘇潮

溫八吟

禁體詩

杜甫贈李龜年詩可疑

杜詩疵累

古人疵句

駱賓王詩

宋廣平梅花有二賦 杜牧華清宮詩失實

詩不忌重字 律詩一聯中有重複字

失黏 一日九遷句不誤

白鵬失素 欣然規往

如龍居坎 悔讀南華句異說

崔護詩改本 竹徑遇幽處

鄉音難改面毛鬚 琵琶花下閉門居

醉翁亭記誤字 東坡集中寄子由詩有誤字

攀栖鶻之危巢 橫看成嶺側成峯

一團茅草亂蓬蓬 王荆公詩改字

畫錦堂記

畫舫之舟

岳陽樓記

楊徽之十聯詩

文文山正氣歌有所本

司馬溫公解禪偈

七審

著書多度語

唐人上宰相書無忌憚

習詩賦杖一百

詩換魚肉

兩字對

肝臟饅頭

一詩兩見

梅花百韵詩

了閑集

卷九

蒼頡二十八字

仙篆

歐陽公集古
錄本劉原父

韻類題選

草書韻會

韻會定正

天竺字源

玉浮圖

極沒要緊

枝官碑

反金人銘

三字經

千字文

家書以千字文編號

上大人

場屋中字體

石文

廿卅卅三字音

茶櫟茶

勝

念字去一畫

以髻爲替

嬌饒

古文已字

可字

豨

書宋爲宋

木易楊

字可愈瘡

剪賣古人字

百壽字圖

四嬋娟

尺紙七萬字

百衲碑

堆墨書

染指書

圖書

印文作卍字式

圍子

行樂圖

畫墨鬼

六逸圖

得一故事則書

生書熟書

焚時文

雕印

新聞

記日本國人語

鶴學問

蝨先生

狐字狸字

卷十

春月放園

假山之始

些子景

梅竹石三友

召客共作一簡

元夕聽人言語

結羊腸

紗囊盛食

十二月乘涼

報曉

天下都綿襖

二月二十二

三十口

古人以痘爲熱病

天鰲

瘧

兜不上下頰

俏

實噓大吉

變髭鬚爲白

轉矢氣

宣連

覆啞啞

採生

舟行伐鼓

石大夫

藥稱一帖

雞卜

迎茅娘

猺人木契

納款

瓜哇國一千三百七十六年

夔

醉達達

自一至十諺語

那

疑心生闇鬼

磨杵作鍼

虎負子渡水

對牛馬誦經

居人旬出一錢

師公

行老

彎者

書忍字

史安

卷十一

老子藏金法

物價貴賤

一至十市語

官市

常州亥

由拳山紙

杭州金箔

鄞州泥孩兒

嘉定竹器

杭州糟瓜

杭州草紙

文字鋪

長生庫

八鮮行

李婆婆

喬姥茶卓子

茶肆點心

棋炒

姚乾

戴蠻

申申如

柳條酒肆

張手美家

芳風館

戴春林家

顧夢麟婦蔬菜

紙織字畫

吳十九

龔春

舒嬌

朱圭

萇鳳

濮仲謙

大秀小秀

明代吳中絕技

傳真心領

施美人

樂五虎

崔官人相字

嗅衣物知吉凶

十二宮看命

太素脈

金杵臼

種牙

白日賊

棒子

市人弄虎

香婆

王昭素市物

劉鑰匙

卷十二

天地生人生物次序

日生一日

月以盈爲消

赤人頂日

颰

花信風

大清明

芒種後壬日種花

白露前雨

梧葉報秋

十月閉口

入易

雅逐月朔日
甲子捷法

茨菰應閏月

金木水火土

百忌歷

火殃

作荒

灰人

三十六禽

地震鼈魚動

禹九州圖

海外五嶽

圓嶠方湖

舜泉

濰縣孤山

太行山孔子回車處

彭亡爲彭祖葬處

桃花源異聞

委羽洞

嶧孔

几陽亭

鉛鉞潭

魚羊其谿

巫山十二峰名

揚州二十四橋

代州虎跑泉

重月泉

富士鎮

平望八測

查浦

懷來橋

萬年橋

神聖湖

山從他處飛來

七十二遙

五洩

貪泉

鷲爲之舟

飛鳥圖

卷十三

尸羅

中國第一佛寺

浮圖之始

摩騰真身

旃檀瑞像

莊王女

觀音心呪

觀音課

普賢大士化女子身

目連卽丁令威

豬頭和尚是定光佛

宋太祖是定光佛轉世

三藏取經遇西域老僧

元奘黎杖

三藏

宋時西域取經故事

覺華寺藏經

維摩十譬

四句偈

萬佛名經

懺

田字殿

淨髮之資

迦羅沙曳

早不茹葷

歐陽氏奉佛

替僧

魚肉供觀音

素食中置雞汁

以麩偽作羊豕之屬

鑿虛煮肉法

魚目充舍利

僧還俗

參寥後還俗

僧妻

以妓捨僧

卷十四

三清

張道陵爲三天法師

趙逸

袁相根碩

徐元直

爛柯事有異說

山陰劉道士

賀知章上昇

張祐

顧元績

安祿山鬼物避葉
太師青衣童子

羅隱

吳彩鸞玉篇鈔

韓湘

呂洞賓及第爲縣令

宋時捕呂洞賓

陳圖南善相術

劉杖活

王迴遇女仙事

何仙姑

曹佶休

李鐵拐

四仙圖

神和子

尹師魯死事

何宗元

何蓑衣

張懷素

劉海蟾

程濟有法術

天元地元人元

無央聖衆

遊仙呪

八禽

鎖鼻術

騎鶴化

學老子

都工

扶箕

宋殿妖人

楓柳人

卷十五

聖廟專祀顏子

顏淵子路像

忠潔侯

利隱侯

妙用真人

上虛夫人

孟公孟姥

六丁爲女子像

巨靈有大小

神荼鬱壘異名

魁星

蒼王

周赧王廟

子胥水仙

餅肆祀漢宣帝

臨平周絳侯廟

福衡爲土神

關三郎

甘興霸廟有關帝像

關刀

孔侯古像

大乾夢錄

趙昱

田相公

黎山大王

武婆婆

周將軍

溫將軍

金龍四大王

九顯靈府君

五戶將軍

叢祠之始

土地

祇廟

禮拜堂

善神

藥王

皮場廟

聖七娘

蕭荷花

馬和尚

謝仙

辟蛇童子

轉智大王

聖佛生子

諸神生日

爲神人寄書

投刺神廟

卷十六

鄂都陰君

羅鄴山

灤河橋

十殿閻王

唐太宗入冥事

唐時城隍已主冥籍

生人司冥事

韓魏公爲陰官

石曼卿事

其中巨鏡

冥中間曉鐘聲謂之天鼓

鬼聞雞鳴如聞鐘聲

陰錢

饌饌

鬼媒人

鬼助作字

打牛魔王

鬼傳書

祖龍死

屍飛

僵人

死十四年而屍猶溫

秦坑殘骨

伯嚭首級

婁敬真身

董卓爲厲

張桓侯頭

昭明太子脛骨

杜少陵骨

燕國夫人

崇禎帝降箕

土棺

楸函

壽堂壽神

歸真室

紫藤繞棺

生墳

堯女冢

王子喬冢

漂母冢

蘇子卿祠墓

劉表墓

木娘墓

三友墓

蔡京父葬臨平山

朱文公溺於風水之說

石灰和土築墳

土饅頭

一抔土可作一杯

卷十七

曲海

元微之崔鶯鶯
商調蝶戀花詞

東廂記

後琵琶

馬絢娘卽杜
麗娘事所本

傳奇白羅衫有所本

漆盒盛兒浮江中

黃鬚翁

李勣救元吉

小關索

嚴三點

王魁

宋江等三十六人

神行之術

俠客偽人頭

蔡指揮女

劉天敘

秋香

玉嬌李

清風閣

雷峯白蛇

女仙外史

明季傳奇

遼東傳

染莊社記

評注稗官

金聖歎身後異事

季麻子

史惠英

無雙譜

卷十八

崑尤戲

演戲之始

猿騎

裸劇

元曲

傀儡戲

影戲

肩擔戲

花十八

過錦

扮馬上故事

弄假婦人

花旦

點戲

彭天錫串戲

江湖十二腳色

衣盔襍把

桂府面具

招琵琶

九絃琴

敲瓦楪

十番鼓

打野呵

倒喇

迎春社火

龍船太子

紐元子

釘打鐵

爭交

珠娘拳

小郎兒曲

五更曲

象棋

骰子

葉子戲

碰壺

跌成

彩選

燈蘭

卷十九

鄭莊公望母臺

宋伯姬黃堂

百里奚故宅

顏淵郭內廟

范蠡宅

賈誼宅

銅雀

麥煙樓

飛霜殿

戢武閣

爾雅臺

哭金祠

紫陽觀

黃鶴樓

綠野堂

六一堂

竹樓雪堂

徐十郎家

邵康節宅契

呂文穆讀書龕

宅子

酒樓紅牆

一字廳

客廨

蝸廬

十二闌干

場房

浴室

卷二十

禹鼎有陰陽之分

項羽刀

諸葛瓦

石季倫家鐵甑

梁武帝硯銘

楊太真玉磬

陳搏酒杯

玉拄斧

宋時弓弩斗石數

宋玉杯

文公檜齋臘墨

朱子造墨

元時庫中古物

沈萬三聚寶盆

脂粉箱

都丞盒

立饋

神樓

倒掖氣

鐵行者

顏眩伽

玉等子

玉活計

翡翠

耍金耍銀

銚劔錢

猛火油

地老鼠

桂管布衫

羽緞羽紗

福色

繡袴繡裏肚

鸚鵡巾

嬾版

安哉

堦

簷子

刀兒

剔齒織

羽扇

撤扇

國初所用之扇

轄音橋

籃輿之輿讀去聲

鼠尾轎

棕船

西湖船用布帆

曹船

木腳道

大木樵

海船用櫓

順風耳

古人奇巧之器

卷二十一

炮鳳烹龍

騎驢酒

鱗黃水

簇酒

空飯

團油飯

饅頭

饅頭不可多食

水飯

小八珍

未酉亥暉肫

消夜果子

茶湯

文思豆腐

蜂糖糕

二韭十八

海哩弊

茗飲始於南人

杭州蘇州茶

閩茶

清泉白石

散子散

牛黃清心丸

聖散子

人參貴紅賤白

人參在本地不效

高麗人參

金汗鉛汗

土石化麩

地鷄地鴨

卷二十二

子產墓柏

武侯祠前大柏至宋猶存

東坡竹

夫人竹

窠竹

月月竹

筍王筍將

宋人猶不以木樨爲桂花

松羔

柳絮不化萍

牡丹花見於
唐以前畫

秋冬牡丹

大小將軍

一品妃

茯苓重三十斤

長生果近代始有

金雞勒

赤山石絨

昂威赫

蓑芝

濕死乾活

公公須婆婆奶

煙草之始

淡婆姑

風茄

蚯蚓爲百合

丁香橄欖

七十二子譜

霍去病

桃共娘

三股梅花剪

栽樹用蝦蟆車

蘿蔔種花法

用鹽插花

六友

卷二十三

麒麟長頭

明萬曆時光山縣產麟

獅子

齊希特

剛巴兒

禿墨砒

牴犏

髡貅

獨象

犴血

申紅

掃雲

狐涎

黑大蟲

碧雲霞

狗挽車

獬豸小狗

畫貓

貓魚

貓食盆

六技鼠

白鼠

朱砂鼠

鼠婚

百被

木鼠

注輦國鸚鵡

粉紅色燕

紅唧唧

漠北白

火鷄

秋風鳥

九頭鳥

鵲上梁

鷹以聯計

馬以彪計

薩多羅解豬語

泉州潭水鮫鱷

蛇能人言

蛇呼妖妖

水獺玉手

魚阜隸

魚鰕雞犬

鱗鱧二物

海蜘蛛

蚊大如蜻蜓

隊隊

寒蛭

鳴秋

治三蟲藥

癆蟲

蛭蝶詐死

茶香室叢鈔卷一

德清俞樾

箕子易

宋方勺泊宅編云王昇字君儀無書不讀晚爲湖婺二州學官罷歸山中杜門二十年不赴調一日以箕子易筮之始治裝西去時年將六十矣

按箕子易不知何書 國朝全祖望讀易別錄所列圖緯陰陽災異占驗諸家凡三百餘種亦云備矣無所謂箕子易者

宋王銍默記云諸先生失其名杭州人遇異僧慈上座

傳以易數云易有三術上者不可言中者猶足了死生
證心地下者知象數休咎遂授其術盡驗其書人猶得
之號三宮易六遇易晁以道得其書不可用然則宋時
術家之書託之於易者固不少也

明代諸家擬易之書

國朝劉鑾五石瓠云呂柟中經文在茲天經文翔鳳太
微經皆繼潛虛湖太元而擬易者也鑾常讀中經板本
一過天經則未之見也翔鳳守父之業復作太微以稟
授某宗伯不識果傳示否

愚謂楊子太元擬易已無謂矣元包潛虛陳陳相因更

可不作宋時有余楹者撰菴書以八起數今僅見其名於樓鑰攻媿集乃至明代尙有此等書何也

宋福建本周易

葉夢得石林燕語云有敎官出易題云乾爲金坤亦爲金何也舉子不能曉不免上請則是出題時偶檢福建本坤爲釜字謬忘其上兩點也又嘗有秋試問井卦何以無彖亦是福建本所遺按此則知宋時刻經書有如此草率者今人得之亦將以爲宋版書歟

石林燕語又云今天下印書以杭州爲上蜀本次之福建最下京師比歲印版殆不減杭州但紙不佳蜀與福

建多以柔木刻之取其易成而速售故不能工福建本
幾徧天下正以其易成故也按此可見宋刻之大概矣
震卦有聲無形

雲溪友議云杜勝給事在杭州問婁千寶曰勝爲宰相
之事如何曰如筮得震卦有聲而無形也注曰周易卜
得震卦如聞雷不見其形凡事皆不成遂也按此殆當
時術者之言非古周易說

占卦新法

占卦之法古以蓍今以錢宋儲泳出新意以木爲三彈
丸丸各六面三面各刻三畫三面各刻二畫呵而擲之

皆三則成九老陽數也皆二則成六老陰數也兩二一三則成七少陽數也兩三一二則成八少陰數也三九六擲而成卦詳見其所著祛疑說按此法殊簡而有理較勝用錢而世無知之者故表出之

趙子昂尙書集注序

明焦竑筆乘載趙子昂尙書序云詩書禮樂春秋皆經孔子刪定筆削後世尊之以爲經秦火之後樂遂無復存詩書禮樂春秋由漢以來諸儒有意復古殷勤收拾而作僞者出焉學者不察尊僞爲真俾得並行以售其欺書之古文是已嗟夫書之爲書二帝三王之道於是

乎在不幸而至於亡於不幸之中幸而有存者忍使僞
亂其閒邪又幸而覺其僞忍無述焉以明之使天下後
世常受其欺邪余故分今文古文而爲之集注焉嗟夫
可與知者道難與俗人言也余恐是書之作知之者寡
而不知者之眾也昔子雲作法言時無知者曰後世有
于雲必愛之矣庸詎知今之世無與我同志者哉按趙
子昂以書畫名後世乃能灼知古文尙書之僞著書以
明之是亦深於經學者矣惜其書不傳要是 國朝攻
古文尙書者之先聲也

按序中不及周易未知何意疑或有誤然焦氏言得子

昂真蹟則又當不誤也

卉服

晉王嘉拾遺記云冀州之西二萬里有孝養之國其俗人年三百歲而織茅爲衣卽尙書島夷卉服之類也又云燕昭王七年盧扶國來朝其國人皆壽三百歲結草爲衣是爲卉服至死不老咸知孝讓昔大禹隨山導川乃旌其地爲無老純孝之國

按此二條並言卉服蓋卽一國也雖未足爲禹貢卉服之塙據然後世木綿布之類實此種爲之權輿

拾遺記又云漢武帝天漢二年渠搜國之西有析淪之

國其國人壽三百歲綴草茅爲繩結網爲衣似今之羅
紩也

菁茅

水經湘水篇注引晉書地道記曰縣有香茅氣甚芬香
言貢之以縮酒也按縣謂泉陵縣

宋朱輔溪蠻叢笑云麻陽苞茅山茅生三脊齊桓責楚
苞茅不入者卽此

宋劉敞公是集三脊茅記云三脊茅出于江淮之間皆
楚越國也有王者則後服無王者則先叛故封禪者必
以三脊茅其意以爲能服楚越則三脊茅可致而封禪

乃宜矣按得此說則知古人制菁茅之貢其意深遠非
貴異物也

秬鬯

宋周密癸辛雜識云明堂所用鬯鬯凡三十斤取之信
州吏云實未嘗用用之大毒能殺人按孔穎達云秬鬯
者釀秬爲酒以鬱金之草和之使之芳香條鬯故謂之
秬鬯然則安有大毒殺人之事後人法古而不得古法
既失其真遂以爲罪皆秬鬯之類也

湯征葛異說

越絕書云湯行仁義敬鬼神天下皆一心歸之當是時

荆伯未從也湯於是乃飾犧牛以事荆伯乃媿然曰失事聖人禮乃委其誠心此謂湯獻牛荆之伯也按此或卽葛伯事傳聞異辭

先大夫瀾花府君印雪軒隨筆論葛伯事曰困學紀聞云葛伯仇餉非孟子詳載其事則異說不勝其煩余謂孟子之說亦異說也葛伯放而不祀湯當以正理論之不必爲此委曲周旋之舉且遺之牛羊尙易也湯之國七十里葛伯爵其國亦當七十里相距遙遙而使亳眾往耕夫舍我穡事而割正夏尙有怨言湯之民其肯負耒耜出疆舍其田而耘人之田乎卽爲之耕矣炊之於

家中餽之於境外健步尙不勝其勞老弱安能任斯役乎況葛伯固一國之君也四家之黍肉幾何劫於路而奪之此鄉曲無賴子所不爲而謂葛伯爲之乎余謂嘗言仇餉或者湯邊鄙之民有與葛接壤者適餽餉田中葛伯挾私憤以殺之如後世爭桑故事湯遂緣此以興師耳不富如孟子云云也

血梳漂杵

宋樓鑰攻媿集北行日錄云相卽河東甲所居東南二十五里朝歌城村所都也中出茜草最多故相纈名天吓俗傳漂杵餘血所化也

關雎

宋王銍默記云李公弼字仲修初任大名府同縣尉因
檢驗村落見所謂魚鷹者飛翔水際問小吏曰此關雎
也因言此禽有異每棲宿一窠中二室仲修令探取其
窠觀之皆一窠二室蓋雄雌各異居也因悟所謂和而
別者以此按此可補傳箋之說所未備

有齊季女

國朝李超孫詩氏族考云何楷詩經世本古義序采蘋
美邑姜也齊讀如字有齊季女國名太公之先所封
也太公本齊後仍封于齊當武王爲西伯時以女邑姜

妻武王計其時太公年已老則邑姜之爲季女無疑襄
二十八年左傳云濟澤之阿行滌之蘋藻寘諸宗室季
蘭尸之敬也季蘭意卽邑姜之名其言濟澤之阿則尤
齊地之證據讀齊爲齋誤矣

按此說殊新以季蘭爲邑姜名雖臆說無徵而以濟澤
證齊地則爲有見至以太公之先本封齊國則尤有可
證者國語云我皇妣太姜之姪伯陵之後逢公之所憑
神也韋注云伯陵太姜之祖逢公伯陵之後大姜之姪
殷之諸侯封於齊地者疑太公本逢公之後與周本昏
姻之國故避紂而歸周其後仍封之於齊復其舊也然

則邑姜爲齊國之季女正可無疑矣

聊樂我員

宋楊敬仲著詩解解此句云我自有員姓者我妻也見樓鑰攻媿集

按此解亦甚新樓氏以古無員姓非之不知此員字若作姓解當讀爲妘說文女部妘祝融之後姓也韋昭注鄭語云陸終第四子曰求言爲妘姓封於郕今新鄭也然則鄭固有妘姓矣妘通作云廣韻二十文云古文雲字亦姓出自祝融之後而此經員字釋文曰本亦作云則其通作妘有明證矣

余嘗於詁經精舍命諸生作越以駸邁解或解云上章
穀旦于差南方之原原大夫氏則此章穀旦于逝越以
駸邁駸亦大夫氏言與駸氏之女俱往也引左傳駸夷
氏證古有駸氏其說亦新附識之

從子于鵠

水經注云涑水又西南逕左邑縣故城南故曲沃也晉
武公自晉陽徙此秦改爲左邑縣詩所謂從子于鵠者
也按毛傳鵠曲沃邑也正義曰曲沃非特一邑而已其
都在曲沃其旁更有邑是鵠與曲沃非一地乃如鄭氏
之說鵠卽曲沃也疑鵠卽曲沃之合音從子于鵠卽從

于于沃非必有二地酈說得之

坎坎鼓我

漢應劭風俗通云空侯漢武皇帝禱祠大后土始用樂人侯調依琴作坎坎之樂言其坎坎應節奏也詩云坎坎鼓我是其文也按此知詩所謂坎坎鼓我者鼓琴鼓瑟皆是毛傳無文鄭箋云爲我擊鼓坎坎然非古義也詩言鼓我與舞我同鼓非樂器也琴瑟皆可鼓何必擊鼓乃謂之鼓乎

出自幽谷

明鄭仲夔耳新云李子田太史曾於秋冬之交見黃鸝

就水次以泥自裹旋蟄水底明年春又自浮出剖泥飛去始解出自幽谷之義按此亦可備解經之一說然詩經本文初不言鶯也

勒少仲同年言有人見桃樹上小蟲輒變成小鳥飛去始悟肇允彼桃蟲拚飛惟鳥之義此亦以目驗者說經少仲曾爲詳言其狀惜不記憶也

實不聰宋神宗說

宋王得臣麈史云神宗皇帝聖學淵探莫窺涯涘黃安中履任崇政說書一日講至祈父之卒章祈父實不聰也曰獨言聰而不言明何也黃曰臣未之思也上曰豈

非軍事尙謀聰作謀故邪侍臣莫不歎服

維帶維蛇

詩維虺維蛇 國朝蕭燾經史管窺引詩推度災作維帶維蛇按莊子齊物論螂蛆甘帶司馬注小蛇也國語爲虺弗推爲蛇將奈何韋注虺小蛇大是虺與帶音近義通但案頭無推度災宜更核之

有北

晉王嘉拾遺記云軒轅去蚩尤之凶遷其民善者於鄒屠之地遷惡者於有北之鄉按詩言投畀有北此或古詩說乎不然四裔皆可投何獨言北也

拾遺記引皇娥之歌當其何所至窮桑證詩桑中之義此則附會不足據

躍躍鼯兔

國朝黎士宏仁恕堂筆記云小雅巧言篇躍躍鼯兔注釋鼯爲狡然塞上實有鼯兔一種視山兔差小足前長後短走則輕首軒尾與所謂躍躍者正似

按明金幼孜北征錄云二十七日上令衛士掘沙穴中跳兔與幼孜三人觀大如鼠其頭目毛色皆兔爪足則鼠尾長其端有毛或黑或白前足短後足長行則跳躍性狡如兔犬不能獲之疑卽詩所謂躍躍鼯兔者也此

與黎所記正是一種惟足之前後長短兩說不同蓋記載之訛也詩云遇犬獲之而此兔犬不能獲則非可據以說詩矣

國朝范昭達征西紀略云十八日抵噶里從者獵得兔兔四五大如鼠頭似兔尾則類鼠細毛黑白色足有長短跳躍甚捷犬不能獲惟網可得皮可爲裘殊煖此但言足有長短未別言其爲前爲後也

嵩高維嶽

漢應劭風俗通云中央曰嵩高嵩高也詩云嵩高維嶽峻極于天按毛傳嵩高貌嶽四嶽也不專言中嶽應氏

之說或本三家賦

宋樓鑰攻媿集跋先大父嵩嶽圖云嵩高維嶽峻極於天巍然居四嶽之中蓋天下之絕境也亦以嵩高維嶽爲指中嶽

左傳是太史氏之流

北夢瑣言云大中時工部尚書陳商立春秋左傳學議以孔聖修經褒貶善惡類例分明法家流也左邱明爲魯史載述時政惜忠賢之泯滅恐善惡之失墜以日繫月終其職官本非扶助聖言飾經旨蓋太史氏之流也舉其春秋則明白而有實合之左氏則叢襍而無徵

杜元凱曾不思夫子所以爲經當與詩書周易等列邱明所以爲史當與司馬遷班固等列取二義乖刺不侔之語參而貫之故微旨有所未周宛章有所未一按此卽漢儒左氏不傳春秋之說唐人猶及見之宋以後不復知矣 本朝爲公羊學者乃始大暢其旨

筮短龜長

左傳稱筮短龜長後世乃怵怵有據水經贛水篇注云贛水又北逕龍沙西昔有人于此沙得故冢刻塋題云西去江七里半筮言其吉卜言其凶而今此冢垂沒于水所謂筮短龜長也又漸江水篇注云穀水東逕獨松

故冢下冢爲水毀其墳文云筮言吉龜言凶百年墮水中今則同龜繇矣又云浦陽江有琵琶圻圻有古冢墮水甃有隱起字云筮吉龜凶八百年落江中謝靈運取甃詣京咸傳觀焉乃如龜繇故知冢已八百年矣按此數事相類疑一事而傳者異其地且小異其辭

昭王南征

楚屈完言昭王南征而不復君其問之水濱不過一時抵拒之辭不謂真有可問者水經沔水篇注云沔水又東逕左桑昔昭王南征死于是水庾仲雍言村老云百姓佐昭王喪事于此成禮而行故曰佐喪左桑字失體

耳汚水又東得合驛口庾仲雍言須導村者舊云朝廷驛使合王喪于是因以名焉今須導村正有大斂口言昭王于此殞斂矣汚水又東謂之橫桑言得昭王喪處也汚水又東謂之鄭公潭言鄭武公與王同溺水于是世數既懸爲不近情矣汚水又東得死汚言昭王濟汚自是死故有死汚之稱王尸豈逆流乎此皆昭王南征之故事干載以下猶慙慙如見也

蠶旗

晉王嘉拾遺記云武王伐紂有大蠶狀如丹鳥飛集王舟因以鳥畫其旗翌日而梟紂名其船曰蠶舟魯哀公

二年鄭人擊趙簡子得其纛旗則其類也按纛旗之義注疏無聞此亦可補杜注之遺

爲人後者不入

國朝黃鑫符簷偶記云唐陸廣微吳地記載餘杭山有夫差義子墳十八所義子之名始見此子路所稱爲人後者不入或卽謂此等乎

按爲人後者禮所不禁而何以見絕於聖門自來不得其說鄭注亦迂迴難通余著羣經平議疑後字乃役字之誤然亦臆說也嘗命詁經精舍諸生解之有樓君名觀者解云此與喪服所言爲人後者不同猶言爲他人

子耳以今言之乃養子非繼子也養子不知起自何時然詩王風言謂他人父謂他人母則古固有之矣以其背親從人故與僨軍亡國者並斥之余取其說刻入詁經精舍五集中今得黃氏說復錄於此

余又思之爲人後者不入此蓋行古之道也古者必無爲人後之說周公制禮始有之文王長子伯邑考早死無後不以成王爲之後可知當時尙無此禮也試以殷制言之大率有子卽有後如湯之子太丁卒立其弟外丙仲壬而仍及太丁之子太甲是也無子卽無後如沃丁崩立其弟太庚太庚崩卽立其子小甲不以小甲爲

沃丁後也小甲崩立其弟雍已大戊大戊崩卽立其子
中丁不以仲丁爲小甲後也孔子作春秋從殷之質然
則子路揚解之言或卽孔子素王之制乎孔子有兄孟
皮早卒孔子不以子思爲之後也禮有子思哭嫂之文
則伯魚亦尙有長子子思不以白也爲之後也後人不
達此意而說此記者皆曲說不通矣

先進於禮樂蘇子瞻說

東坡集有孔子從先進論其略云君子欲有爲於天下
莫重乎其始進也始進以正猶且以不正繼之况以不
正進者乎孔子之世其諸侯卿大夫視先王之禮樂猶

方圓亦炭之不相入也進而先之以禮樂其不合明矣
是人也以道言之則聖人以世言之則野人也若夫君
子之急於有功者則不然其未合也先之以世俗之所
好而其既合也則繼以先王之禮樂然其進不正未有
能繼以正者也故孔子不從按蘇氏解先進後進與古
說絕異未詳所本後儒說論語亦無引蘇氏此說者

孰謂微生高直孫奕說

宋孫奕示兒編云此言微生高於乞墮之際盡其委曲
之道先僞解乞諸其鄰爲不直是直情徑行而無委曲
周旋之義豈善與人交者哉按此說可備一解當時必

有人譏微生高過於直遂者故夫子以此解之耳

日本國人物茂卿作論語徵說此章云高蓋孔子鄉人以直見稱孔子亦愛之故反言以戲之親之至也意者孔子家乞醢曰或者佯爲不知皆戲言也若他人乞之則是瑣事孔子何與聞其瑣事乎按此說亦佳不然則孔子轉似攻發人之陰私矣

有馬者借人乘之劉元城說

宋陳鵠耆舊續聞云有問劉元城先生吾猶及史之闕文也有馬者借人乘之今亡矣夫先儒說此多矣但難得經旨貫串元城曰有馬者借人乘之便是史之闕文

後人見此語頗無謂遂從而削去之故聖人歎曰今亡矣夫蓋歎此句之不存也聖人作春秋於郭公夏五皆存之於經蓋慮後人妄意去取失古人忠厚之意

負版

宋葉夢得石林燕語云古喪服之制前有喪後有負版左右有辟領此禮不見於世久矣翟內翰公異嘗言論語式負版非版籍之版乃喪服之版以子見齊衰者必式爲證按如翟說則上句已言凶服者式之何必更出此文余重表姪戴子高望作論語注實用其說而云凡與人相見見其面則式不然則否負版者雖當車前亦

爲之式所以重喪頗足補翟說之所未盡

長沮桀溺語

梁元帝金樓子立言篇云長沮浴桀溺問焉今日浴佳邪曰佳長沮曰浴須浴其內然後其表五藏上心府尙有未潔四支八體何爲者邪夫浴者將使表裏潔也內苟含瑕何遠浴邪按此語不知出何書

在陳絕糧

荀子宥坐篇載孔子厄於陳蔡之間曰女庸安知吾不得之桑落之下楊倞注云桑落九月時也夫子當時益暴露居此樹之下按孔子絕糧在九月時他書未載

人知孔子絕糧不知孟子亦嘗絕糧漢應劭風俗通云
孟子絕糧於鄒薛困殆甚退與萬章之徒序詩書仲尼
之意作書中外十一篇是孟子亦嘗絕糧也

刺孟諸書

孟子一書至今上配六經然北宋以前不甚重自王充
論衡有刺孟篇後馮休著剛孟司馬公作疑孟李泰伯
作非孟晁以道作詆孟黃次伋作評孟其書不盡傳人
亦不盡知齊東野語曾臆舉之

羅大經鶴林玉露云鄭叔文著崇正論亦非孟子曰軻
忍人也辯士也儀秦之流也戰國縱橫捭闔之士皆發

家之人而何能以詩禮者也其言尤悖羅氏則云孟子以儀秦之齒舌明周孔之肺腸此何可非泰伯所以非之者謂其不當勸齊梁之君以王耳余謂孟子憂當世之無君者也泰伯憂萬世之無君者也雖似持平之論而亦不滿於孟子

始作俑者

國朝馬驢繹史引王肅喪服要記云孔子曰甯設桐人乎公曰齊人虞卿遇惡繼母不得養父死不能葬自知有過故作桐人吾父生得供養何桐人爲按說文人部偶桐人也淮南子繆稱篇魯以偶人而孔子歎高注曰

偶人相人也治說文者疑桐人是相人之誤相人者象人也乃觀此文亦作桐人疑其不誤蓋古偶人以桐爲之耳孔子曰始作俑者其無後乎自來不知始作俑者爲何人據此則齊人虞卿也

吾我二字

國朝楊復古夢蘭瑣筆云元趙惠四書箋義曰吾我二字學者多以爲一義殊不知就己而言則曰吾因人而言則曰我吾有知乎哉就己而言也有鄙夫問於我因人之問而言也按此條分別甚明二三子以我爲隱乎我對二三子而言吾無隱乎爾吾就己而言也我善養

吾浩然之氣我對公孫丑而言吾就已而言也

以是推之予惟往求朕攸濟予卽我也朕卽吾也越予
冲人不邛自恤予卽我也邛卽吾也其語似復而實非
復

先聖先師

國朝喬松年蘿摩亭札記云凡始奠於先聖先師鄭注
謂周公若孔子然計此禮尙在孔子之前劉氏彝曰虞
庠以舜爲先聖夏學以禹爲先聖殷學以湯爲先聖東
膠以文王爲先聖

按此雖臆說而似有理惟先聖旣代有其人則先師似

亦宜然荀子大略篇曰舜學於務成昭禹學於西王國
呂氏春秋尊師篇曰帝舜師許由禹師大成贊湯師小
臣文王武王師呂望周公旦新序雜事篇曰舜學乎務
成附禹學乎西王國湯學乎成子伯文王學乎鉸時子
斯此皆先秦古書所傳當有依據或卽三代時所謂先
師乎西王國未詳何人楊倞注引或說曰大禹生於西
羌西王國西羌之賢人也小臣高誘注以爲卽伊尹

經書刪節本

宋周密癸辛雜識云賈師憲有三禮節左傳節諸史要
畧又欲節十三經注疏未及入梓然則經史刪節本宋

時已有之矣

舍注疏立異論

蘇子由龍川別志云王文正公爲相南省試當仁不讓於師賦時賈邊李迪皆有名場屋及奏名而邊迪不與迪以落韻邊以師爲眾與注疏異特奏令就御試王文正議落韻失於不詳簡耳若舍注疏而立異論不可軌許恐從今士子放蕩無所準的遂取迪而黜選按今功令場屋中不遵朱注者不取亦此意也

農孝經酒孝經

宋孫奕示兒編云孝經孔子所論也孰知郭良輔又變

爲武孝經

原注唐

鄭氏又易爲女孝經

原注唐侯莫陳逸妻

以至農

孝經

原注皇朝賈元道

酒孝經

原注不著撰人名氏

紛紛而出按諸書今

無傳且莫知其名矣

又按酒孝經發端必云其無加於酒乎當是游戲之作
余此書本非所以說經而鈔撮所及亦偶有及經義者
遂合爲一卷終以此條者以見所說似經義而實非亦
猶酒孝經之徒有經名也

茶香室叢鈔卷二

德清俞樾

盤古卽元始天尊

晉葛洪枕中書云昔二儀未分已有盤古真人天地之精自號元始天王遊乎其中按任昉述異記吳楚閒說盤古氏夫妻陰陽之始也而道家又有元始天尊隋書經籍志云有元始天尊生於太元之先是也今據枕中書則盤古與元始天尊二而一矣

枕中書言元始天王與太元聖母通氣結精元始君經一劫乃一施太元母天皇十三頭地皇十一頭人皇九

金一
頭皆其所生是卽述異記所述吳楚間說盤古夫妻陰陽之始者也荒誕之說聊博異聞耳胡五峯皇王大紀以盤古爲始是直以元始天尊爲萬代帝王之鼻祖矣可笑孰甚也

許耳

梁元帝金樓子云許耳之子名曰由字道開一字武仲黃白色長八尺九寸兄弟七人十九而隱堯欲禪之由乃洗耳按許由父名世所罕聞并其儀狀亦僅見於此

章鷁

梁元帝金樓子云商均一名章鷁按鷁疑鷁字之誤商

章同聲均與蠲一聲之轉耳然金樓子所載古人名字多詭異如商湯七名有瘠肚之名亦不可解也

商湯七名五云天乙六云地甲今人知有天乙不知有地甲

伯夷叔齊

梁元帝金樓子云夷雍之子名伯夷叔齊不食周粟餓於首陽依麋鹿以爲羣叔齊起害鹿鹿死伯夷恚之而死按夷齊之死文選注引古史考云伯夷叔齊隱於首陽山采薇而食野有婦人謂之曰子義不食周粟此亦周之草木也於是餓死其事已屬異聞而此乃云因害

鹿而死則又異矣

又按列士傳亦載此事云夷齊隱於首陽山王摩子入山難之曰君不食周粟而隱周山食周薇奈何二人遂不食薇經七日天遣白鹿乳之得數日夷齊私念此鹿肉食之必美鹿知其意不復來二子遂餓而死小說家言鄙俚可笑也

又按困學紀聞原注載陳彭年對真宗語夷齊父名初字子朝見春秋少陽篇而金樓子謂之夷雍之子亦異
伯夷之弟

晉張華博物志云靈帝光和元年遼西太守黃翻上言

海邊有流屍露冠絳衣體貌完全使翻感夢云我伯夷之弟孤竹君也海水壞我棺槨求見掩藏按列士傳云孤竹君薨伯夷長子當立乃讓與弟叔齊不受乃讓與異母弟伯僚此屍其卽伯僚歟惟伯夷旣字伯此異母弟何以亦字伯豈一母之子卽自爲伯仲歟文選辨命論云夷叔斃淑媛之言注引崔瑋七錫曰三王行化夷叔隱已稱夷爲叔抑又異聞

水經濡水篇注云漢靈帝時遼西太守廉翻夢人謂曰余孤竹君之子伯夷之弟遼海漂吾棺槨聞君仁善願見藏覆明日視之木上有浮棺吏嗤笑者皆無疾而死

于是改葬之事與此同惟太守之姓異未詳孰是

又按此文疑有脫誤本當云余孤竹君之子伯夷之弟伯遼海水漂吾棺槨蓋伯遼卽伯儵也古字通耳後人不知有伯遼之名誤以遼海二字連讀遂去伯字并去水字

比干心十二穴

梁元帝金樓子云殷帝紂淫虐王子比干諫弗聽剖其心十二穴破而觀之按史記但言有七竅此云十二穴亦異聞也

以箕子爲風伯

明楊慎藝林伐山云顏之推賦歲精仕漢風伯朝周以箕子爲風伯謂箕星好風也

按太公金匱云武王伐紂都洛邑明年陰寒雨雪十餘日甲子平旦五丈夫乘馬車從兩騎止王門外向父曰四海之神與河伯風伯雨師耳使謁者各以其名召之五神皆驚顏賦所稱風伯朝周當指此事非必箕子然上句歲星東方朔也則下句風伯又似實有其人升庵以爲指箕子或亦一說

慈童

日本人守屋元泰字伯亨著有東陽集集中有題慈童

畫五言絕句一首序云世傳慈童事周穆王有寵嘗誤
越王枕王放諸酈縣山中私憫焉臨去授以法語曰朝
朝誦之可爲周身之防慈童恐遺忘題諸菊葉旣而有
露涔涔滴於溪流慈童飲之極甘美遂爲仙下流之民
三百餘家飲者悉得上壽按此事不知出何書中國人
但知有酈縣甘谷事不知有慈童也是真異聞矣豈周
秦閒相承有此說由徐福輩傳述至彼乎

水經湍水篇注云湍水又南菊水注之水出西北石澗
山芳菊溪亦言出析谷蓋溪澗之異名也源旁悉生菊
草潭澗滋液極成甘美云此谷之水土餐挹長年可空

王暢太傅袁隗太尉胡廣並汲飲此水以自綏養按此亦卽南陽酈縣甘谷也世知有甘谷不知有析谷因慈童事并記之

管仲父名

國朝程大中四書逸箋云管夷吾字仲其父名山亦字仲見陳心叔名疑

先聖本名兵

宋周密癸辛襍識別集云陳召初名紹欲改名或言增損偏旁可也昔先聖本名兵已乃去其下二筆及問其語所本則不能知可謂異聞也按此真無稽之談以古

文論此二字亦不相似乃謂去下二筆則是孔子時已
有今之正書矣

國朝喬松年蘿摩亭札記云此所謂兵乃古長字非兵
戈之兵其字下從儿不從八按說文長篆下所載古文
有如此者然亦異說也

孔子至吳越

吳越春秋云越王旣已誅忠臣霸於關東從瑯琊起觀
臺周七里以望東海孔子聞之從弟子奉先王雅琴禮
樂奏於越按越絕書亦有此文是孔子嘗親見句踐矣
然此當在越王徙都瑯琊之後孔子未必至吾浙也

國朝馬驥繹史引吳越春秋云夫差聞孔子至吳微服
觀之或人傷其指王怒欲索或而誅之子胥諫而止按
此則孔子固嘗至吳矣而今本吳越春秋無此文

素相

國朝梁同書曰貫齋塗說云孔子素王邱明素臣人習
用之素相未有有用者論衡超奇篇孔子之春秋素王之
業也諸子之傳書素相之事也

蘧伯玉軼事

晉王嘉拾遺記云師涓出於衛靈公之世造新曲以代
古樂蘧伯玉諫曰此雖以發揚氣律終爲沈湎淫漫之

音無合於風雅非下臣宜薦於君也靈公乃去其聲而親政務師涓退而隱跡蘧伯玉焚其樂器於九達之衢按此乃蘧大夫之軼事

曾子子貢軼事

國朝程大中四書逸箋云人知子疾病子路請禱不知孔子病子貢出卜太平御覽引莊子云孔子病子貢出卜孔子曰子待也吾坐席不敢先居處若齋飲食若祭吾卜之久矣

又云人知曾子不忍食羊棗不知曾子不忍食生魚孝子傳云曾參食生魚甚美因吐之人問其故參曰母在

之曰不知生魚味今我食美故吐之遂終身不食生魚
宰我朝歌墮車

水經淇水篇注引論語比考識云邑名朝歌顏淵不食
七十弟子揜目宰予獨顧由是墮車宋均曰子路患宰
予顧視凶地故以足蹙之使墮車也今人止知墨子迴
車事不知有宰予墮車事

曾子沈水

宋書文九王傳建元初故景素秀才劉璣上書曰臣聞
曾子孝於其親而沈乎水介生忠於其主而焚於火按
困學紀聞引顏氏家訓曾子七十乃學謂未詳所出若

曾子沈水事更千古奇聞矣

按琴操載尹伯奇無罪爲後母譏而見逐援琴作操曰
履朝霜兮採晨寒云云曲終投河而死然則孝於親而
沈乎水當用伯奇事或本作尹子後人誤作曾子耳

子韋

晉王嘉拾遺記云宋景公之世有野人被草負笈扣門
而進曰聞君愛陰陽之術好象緯之祕請見語及未來
之兆次及已往之事萬不失一景公賜姓曰子氏名之
曰韋卽子韋也按子乃宋姓此後世人君以國姓賜人
臣之始

華子期

謝康樂集遊名山志云華子岡麻山第三谷故老相傳華子期者祿里先生弟子翔集此頂故華子爲稱也按祿里先生卽四皓之一華子期蓋四皓之徒矣

毛萇

唐陸廣微吳地記云洞庭山記曰洞庭有二穴昔闔閭使龍威丈人尋洞遇一石室石几上有素書三卷持回孔子曰此夏禹之書並神仙之事言大道也丈人姓毛名萇號曰毛公今洞庭有毛公宅按此與傳詩之毛公同姓名是又一毛萇也

周貞實

宋曾敏行獨醒雜志云零陵淡山有石巖秦時有隱者
曰周貞實嘗隱於巖中始皇好神仙方士或薦貞實始
皇召之使凡三往貞實不起遂化爲石按此秦之隱君
子更在淮陽應曜之前而世無知者

時亮

後魏酈道元水經河水篇注引秦川記云河峽崖傍有
二窟一曰唐述窟高四十丈西二里有時亮窟高百丈
廣二十丈深三十丈藏古書五笥亮南安人也按時亮
不知何時人必古之隱君子也

按唐述者據上文云羌曰鬼曰唐述因時見神人往還
因名之爲唐述山指其堂密之居謂之唐述窟然以時
亮例之安知唐述非亦人姓名乎

寇先

水經睢水篇注云睢水又東逕睢陽縣故城城西門卽
寇先鼓琴處也先好釣居睢水旁宋景公問道不告殺
之後十年止此門鼓琴而去宋人家奉事之按此則
寇先者亦近乎仙矣

孫什

又濟水篇注云濟水又逕什城北祝阿人孫什將家居

之以避時難因謂之什城焉是孫什亦必隱居避世之士

卜成

又洛水篇注云又東北九山溪水入焉水出百稱山東谷仲長統曰昔密有卜成者身遊九山之上放心不拘之境謂是山也卜成未知何時人亦一高士

謝允

又沔水篇注云曾水導源縣南武當山一曰太和山亦曰嶠上山又曰仙室晉咸和中歷陽謝允舍羅邑宰隱遁斯山故亦曰謝羅山焉然則謝允去官高隱亦一陶

淵明矣

所輔

又河水篇東北過溧陽縣北注云漢安帝永初二年劇賊畢豪等數百乘船寇平原縣令劉雄門下小吏所輔浮舟追至厭次津與賊合戰並爲賊禽求代雄豪縱雄于此津所輔可謂孝盡愛敬義極君臣矣按所姓罕見世徒知漢有所忠不知又有所輔

水經注中所載古人姓名多湮沒不著因表出數人尙友者儻有取乎

虞翻字定安

水經陰溝水篇注云武平縣故城西南七里許有漢尚書令虞詡碑碑題云虞君之碑諱詡字定安按范蔚宗漢書詡字升卿定安蓋其幼字也

杜周三子名

宋王楙野客叢書云唐世系表杜周三子延壽延考延年則知本傳所謂二子夾河爲郡者卽延壽延考本傳但載少子延年而不載前二子名因表出之按口知錄言兄弟二名而同其一字世謂之排行起於晉末漢人無有然杜氏三子皆以延字爲名則西漢已有之矣或譜牒所言多出後人偽造未盡可據乎

盧白頭

後魏楊銜之伽藍記云國子博士盧白頭字景裕范陽人也性愛恬靜邱園放傲學極六經流通百氏晉泰初起家爲國子博士雖在朱門以注述爲事注周易行於世按盧白頭之爲人知者尠矣宜表出之

開元中十八學士

元白珽湛淵靜語云元宗開元中於上陽宮含象亭以張說徐堅賀知章趙冬曦馮朝隱康子元侯行果韋述敬會真趙元默母巽呂向咸麋業李子釗東方顛陸去泰余欽孫季良爲十八學士命董萼畫像御製贊爲千

載翰施盛事按太宗時以杜如晦房元齡等爲十八學士至今豔稱之而不知開元時又有此十八學士

都督閻公壻

滕王閔序都督閻伯璵欲其壻吳子章爲之此事人所共知也王定保摭言云王勃著滕王閣序而閻公意屬子壻孟學士者爲之已宿構矣則閻公之壻是孟學士而非吳子章未詳孰是

王子安序云騰蛟起鳳孟學士之詞宗紫電青霜王將軍之武庫孟與王必坐中上客猶都督閻公宇文新州皆實言當時之人非古人也後人不達此而異說譏起

矣閻公之壻當是吳子章而非孟學士孟學士必當時
負文望者或閻公欲揚其壻之名使孟學士宿構一文
俾其壻冒爲己作以誇坐客耳王定保知此文爲孟學
士作蓋傳聞之得實者而以孟學士卽閻壻則又誤矣
余于千載下發古人之覆未知然否

晉羊球登西樓賦云畫棟浮細細之輕雲朱栱濕濛濛
之飛雨王子安滕王閣詩畫棟珠簾一聯卽本此不獨
落霞秋水兩句有所沿襲也

吳嶠

唐柳宗元龍城錄云吳嶠霅溪人年十三作道士煬帝

元年過鄴中告其令曰中星不守太微而旺氣流萃於
秦地令不之信至神堯卽位方知不誣嶠精明天文卽
袁天綱之師也至今人知有袁天綱不知有其師吳嶠
嘗溪人則吾郡人也宜表出之

房元齡名字

宋張溟雲谷襟記云舊唐書房喬字元齡新書元齡字
喬歐陽公集古錄中有元齡墓碑亦云字喬隋人多以
字爲名元齡實本名喬後來卽以字行卽以名爲字也
實萃唐書音訓云唐十八學士圖贊皆當時墨迹云房
元齡字喬年豈以單稱不類衣德遂添一年字乎宰相

世系表又以元齡字喬松未知何據按喬年喬松人所罕知宜表出之

張龜齡

唐顏真卿撰浪跡先生元真子張志和碑云元真子姓張氏本名龜齡改名志和字子同按張志和原名世罕知者志和兄松齡有答弟志和漁父歌見全唐詩

溫庭雲

北夢瑣言曰溫庭雲字飛卿或云作筠字今庭筠之名行而庭雲之名廢矣

枯松太保

明謝肇淛文海披沙云唐王建平東川諸將莫不爭功
獨王宗裕立枯松下未嘗自言時人謂之枯松太保與
馮異稱大樹將軍可謂的對

衛遜

唐許渾題衛將軍廟詩序云將軍名遜陽羨人少習詩
書學弓劍二十七游并汾閒遇神堯皇帝始建義旗天
下既定錄其功拜將軍宿衛以母老病乞歸侍殘年詔
許之既而以孝敬睦闔門以然信居鄉里及卒邑人懷
其賢廟宇荆溪之湄以平生弓甲縣東西廡下歲時祠
祭頌福其土焉文士王敖撰碑辭實詳備惜乎國史闕

書其人因題是詩於廟壁按此則遜亦唐初一名將而名氏翳然記此以補唐史之遺

韓臈眼

卽韓通也齊東野語云焦千之學於歐陽公一日造劉貢父劉問五代史成邪焦對將脫藁劉問爲韓臈眼立傳否焦默然劉笑曰如是亦是第二等文字

馮道不知生日

明朱國楨湧幢小品云馮道自幼涉亂離不知生日在天福中爲上相晉帝問之欲致賀道對以實是馮道終身無生日也然不知出何書據舊五代史道官至戶部

侍郎始丁父憂不當不知有生日

陶穀本姓唐

宋王闢之澠水燕談錄云陶穀姓唐唐宰相莒公儉之後祖彥謙有詩名號鹿門先生穀避留祖名改姓陶後歷事累朝不復還本姓士大夫譏之

宋錢易南部新書云陶穀小名鐵牛李濤嘗有書與之曰每至河源卽思令德唐彥謙之孫也以石晉諱改姓焉

八大王

宋王闢之澠水燕談錄云慶厯中皇叔燕王元儼薨仁

宗追悼尤深詔有司擇立號之尤尊美者乃特贈天策大將軍王性嚴毅威望著于天下士民識與不識呼之曰八大王犬戎尤憚之按今小說中說宋仁宗時事有所謂八大王者當時乃真有此稱也

宋沈淑諸史云富鄭公上河北守禦十二策曰燕王威望著于北虜燕薊小兒每遇夜啼其家必驚之曰八大王來也每牽馬牛渡河必曰莫大王在海裏其畏之如此

癸辛襍識載羅壽可遊汴梁書所見云登雲樓俗呼八大王樓蓋初爲燕王元儼所居

八大王之子

歐陽文忠公歸田錄曰華元郡王允良燕王子也好坐木馬子坐則不下或饑則便就其上飲食往往乘輿奏樂於前酣飲終日亦其性之異也木馬子不知何物宋沈淑諧史云周王元儼慶曆四年封燕王好坐木馬遇饑則於其上飲食仍奏樂於前或終日在上酣飲是又以爲燕王事不應父子同好木馬殆傳者誤也

按宋周密志雅堂癸鈔云劉貞父書燕王小子元安年三十餘不知人事每食必置糞少許於食中世傳黨進之事似之據此可知八大王英武而其子愚蠢所謂木

馬子者竟便溺之器考新唐書回鶻列傳云突厥三部落乘木馬馳冰並以黑漆足屈木支腋蹴輒百步此言木馬不言木馬子殆猶今之冰牀非可用之於居家者也元吳自牧夢梁錄有項桶浴桶馬子桶之名此言馬子不言木然曰桶則固以木爲之卽今所謂馬桶也在宋時已有馬子桶之稱則允良所坐木馬子必是此物因坐其上進食傳聞過實乃有食必置糞之言亦可見其清狂不慧不足紹其父之遺風矣

宋周輝清波別志云吳虎臣漫錄言某王幼子年三十餘不知人每食必置糞少許於食中按此亦卽允良之

事惟允良與元安有二名未詳孰是至諸史謂是燕王
元儼事則失之

蘇杲

元白珽湛淵靜語云眉州蘇先生杲老泉之祖輕財好
施濟人之急孜孜若不及歲凶賣田賑濟其鄉里逮秋
熟人將償之終憐其窶辭不受久致破業厄於饑寒然
未嘗以爲悔而好施益甚後三蘇以文章名天下按蘇
吳之行誼略見於蘇明允族譜後錄今人但讀其族譜
序而族譜後錄上下兩篇罕有讀者故其先世事實知
者鮮耳

林和靖祖

國朝崔應榴攤飯續談云十國春秋林克己錢唐人忠懿王時官通儒院學士博學善文章宋隱士逋卽其孫也

司馬公實王介卿

國朝崔應榴攤飯續談載司馬溫公會字公實見瞿耆年籀史注王荆公初字介卿見曾子固懷友詩按今人知有君實不知有公實知有介甫不知有介卿也又引後村詩話云石曼卿舊字安仁亦人所罕知者

蘇明允諡

元劉壎隱居通議云三蘇皆得謚文老泉文安東坡文忠穎濱文定森然鼎峙爲一代文宗余按老蘇之謚本傳不載據本傳云乃以爲霸州文安縣主簿豈後人稱其官曰蘇文安而劉氏誤以爲謚乎

東坡一字子平

國朝陳錫路黃媪餘話云蘇子瞻一字子平文與可月岳齋詩云子平一見初動心輦致東齋自摩洗又云子平謂我同所嗜萬里書之特相寄注云子平卽子瞻也余按賦者車前橫版也則名賦字平義蓋相稱

國朝沈濤銅殿斗齋隨筆云陸深玉堂漫筆云子瞻一

字和仲子由一字同叔懷素自敘帖近刻石於蘇州蘇
轅城一跋云予兄和仲自題曰蘇轍同叔案俞德鄰佩
韋齋輯聞東坡一字仲和洗玉池銘末云仲和甫銘之
維以識德是字仲和非和仲也余謂和仲或作仲和此
無足異惟與子平之字又不同何東坡先生舊字之多
也

老泉山人

宋葉夢得石林燕語云蘇子瞻謫黃州號東坡居士晚
又號老泉山人以眉山先塋有老翁泉故云然則世稱
蘇明允爲老泉誤矣

袁絢

宋蔡條鐵圍山叢談云歌者袁絢乃天寶之李龜年也
宣和間供奉九重嘗爲吾言東坡公昔與客遊金山適
中秋夕共登金山妙高臺命絢歌其水調歌頭坡爲起
舞曰此便是神仙矣按袁絢爲東坡客知者鮮矣是宜
與赤壁舟中之楊世昌同表祿之也

邵餗

負暄野錄

無撰人姓名

云邵居上餗工爲釵股篆范文正公

作巖先生祠堂記欲求其書而刻之石余嘗傳得范公
書云云余又於巴陵登岳陽樓乃滕宗諒子京知郡日

所脩記亦范文正公所撰蘇舜欽書邵餗象額時號四絕按范文正公兩文至今膾炙人口而邵餗之名稍晦范公與邵書云非託之奇人則不足傳於後世先生篆高出四海誠能枉神筆於片石則子陵之風後千百年未泯其高尚之爲教也亦大矣哉是文正公之意欲已文託邵書以傳邵之見重於當時可見矣

章望之

癸辛雜識曰正閩之說尙矣歐公作正統論章望之著明統論以非之蘇長公正統論引章子之說章子卽望之也

蘇佛兒

東坡志林載合浦老人蘇佛兒年八十二有兄二人長九十二次者九十

按父子兄弟俱長壽者宋王闢之澠水燕談錄云開寶中鄆陵許永爲鄆州廬縣尉七十五歲其父瓊九十九歲長兄八十一次兄七十七藝祖召瓊問唐季事賜衣幣鞍馬

老申

癸辛襍識載羅壽可再遊汴梁書所見云相國寺有石刻云蘇子瞻子由孫子發泰少游同來觀晉卿墨竹申

先生亦來元祐三年八月五日老中一百一歲惜老申不知何人也

張百杯張百篇

宋蔡條鐵圍山叢談云張端公伯玉仁廟朝人也名重當時號張百杯又曰張百篇言一飲酒百杯一掃詩百篇也按李太白斗酒百篇人人知之不知又有張伯玉也

四清

元揭傒斯曼碩詩有題四清圖詩一清曰王右軍二清曰軒轅彌明三清曰玉川子四清曰林和靖按四子似

金一
不相類不知何以合爲四清也

黃子久名靜堅

國朝葉廷琯鷗波漁話云康熙間吳中顧來侯復纂書畫壯觀錄載黃子久水墨山水署款大癡道人靜堅此名不經見余按堅與久義相應名靜堅故字子久也

海鷗

明楊慎藝林伐山云柳公權僕名海鷗竊銀杯者

鄧馱

宋周羽沖三楚新錄云鄧詢美連郡人也背偃時謂之鄧馱按今人以偃者爲駝子其字實當作馱

張小舍

國朝王應奎柳南隨筆云前明成宏間吳郡東北夷亭鎮有張小舍者善捕賊盜百無一遺盜賊爲之語曰天不怕地不怕只怕夷亭張小舍里巷至今傳之張小舍名浩字彥廣號南坡沈石田之外祖徐武功爲誌其墓按張小舍一捕盜之人而亦以成名後世何途無人才乎

陳濟

國朝張爾岐蒿庵閒語云明修永樂大典以武進布衣陳濟爲總裁按陳濟之名今知者罕矣

又按吳長元宸垣識餘云永樂大典二萬二千八百七十卷一萬一千九十五本目錄六十卷湖廣王洪編纂南翔八老

國朝王漁洋香祖筆記云唐時并三易集有南翔八老人詩序云南翔里有八老人爲社徐喬九十六趙陸九十四陸淙八十五徐勳張樂俱八十四董儒八十三朱梓八十二陸球八十一居止不一二里以林酒談笑相娛樂誠太平盛事也按此八老人當在明正德嘉靖間故詩云正嘉遺事多訛謬欲問鑿輿南幸年

吳門四才子

國朝王應奎柳南隨筆云徐博士昌穀在前明成宏間與唐解元伯虎祝京兆希哲文待詔徵明稱吳門四才子而昌穀實吾邑梅里鎮人也按唐祝文三君婦孺皆知而徐稍晦今盲詞家乃以唐祝文周爲四才子周爲周美成北宋人也大可一嘆矣

又按明神宗時秦淮四美人爲朱無瑕鄭無美馬湘蘭趙今燕見無名氏所著秦淮畫舫餘談

吳雨田

國朝李斗揚州畫舫錄云鄭版橋工隸書自成一派關帝廟道士吳雨田從之學字可以亂真然則世所傳版

橋道人書安知非出吳兩田筆邪

朱太平

明都穆都公譚纂云沈石田值朱太平亦善山水

馮玉瑛

國朝楊復吉夢闌瑣筆云馬士英善繪山水得之者改其名曰馮玉瑛

余幼時有詩云君子雖爭沒世名流芳貽臭要分明曹
蜍李志皆千古莫使人更馮玉瑛